

知  
足  
齋  
文  
集

知足齋文集卷五

大興 朱珪 石君

墓誌銘

掌陝西道監察御史

特恩贈副都御史曹公

墓誌銘

乾隆五十七年壬子春侍御劔亭曹公卒于京邸手書遺其子曰墓誌之文必求朱石君先生爲之蓋石君最知我而其文必傳也其壻陳慤以其孤江書來告哀且求銘曰此先子之遺命也予泣曰我何以傳我友哉然吾何敢遽銘吾友也慤屢趣之曰姑有待越嘉慶己未

江將扶其繼母趙淑人之柩歸合葬于公阡固以請珪曰我今乃可以報吾友矣公諱錫寶字鴻書號劔亭晚號容圃江蘇上海人祖贈公煜曾父贈公培謙母張淑人以康熙己亥年十一月三日辰時生公幼而穎敏絕倫見愛于祖父母弱冠以第一人入學乾隆辛酉以國學生舉順天鄉試壬戌考取內閣中書丁贈公憂戊辰服除起直軍機處庚午補中書時與莊殿撰培因同直齊名莊旣取大魁人望屬公傅忠勇公將奏擢侍讀力辭公笑曰人各有志不可強也丁丑會試中式殿試二甲五名進士改庶吉士丁張淑人憂扶喪南旋忽邁

瘍疾委茶將十年手鈔經史古詩文華嚴皆成部疊架  
作詩尤長于五古有陶謝韋孟真意丙戌散館改刑部  
主事戊子遷員外郎庚寅充河南鄉試副考官擢郎中  
辛卯充會試同考官督學山西乙未授山東糧道丁酉  
以旗丁鬪毆命案呈吏議來京以部員用在四庫全書  
處行走分辦黃簽考證書成議敘以國子監司業用乙  
巳與千叟宴

特旨授陝西道監察御史丙午上封事劾奏大學士和  
珅家人劉全衣服車馬房屋踰制先有某卿竊知其事  
飛書漏其事于和乃星夜毀其跡和荅某書曰必有以

厚報于是奉

旨聞京王大臣勘查僭妄蹤跡竟不可得而公危甚馳赴熱河待詢當是時和當路已十餘年中外無一人敢投鼠者聞公此舉皆咋舌噤不能吐氣一二有心人仰屋竊歎而已亦未敢頌言公賢皆曰曹公禍且不測然上竟不以罪公也部議鑄三級奉

旨改爲革職畱任蓋

先帝保全言官故卒無敢中傷之者丁未充 文淵閣詳校戊申轉掌陝西道巡視北城八月充鄉試同考官九月以他御史事波及降二級畱任庚戌以後得嘔血

疾自是貧病憊甚乃自作年譜壬子春正月十九日亥時卒于官年七十有四越七年

今上親政六日而和下獄正月十八日

賜和死某卿游擢掌憲矣即日罷斥

上于是追念出突徙薪之功惟公一人而已二十八日特下

詔曰前御史曹錫寶參奏和珅家人劉全倚勢營私家貲豐厚時當和珅聲勢薰灼舉朝無一人敢于糾劾而曹錫寶獨能抗辭執奏實屬可嘉不愧諍臣之職今和珅治罪後查辦劉全家產竟有二十餘萬之多是曹錫

寶前此所劾信屬不虛宜加優獎以旌直言著加恩追贈副都御史伊子照加贈官銜給予蔭生于是天下聞之莫不吞聲心折呼

聖明萬歲而天道久而必信也嗚呼公真不朽矣何待珪一言以爲輕重耶憶珪初識公于丁卯八月公視學山右珪爲藩牧相聚者三年中間離合亦不數數見也而公獨以珪爲知我且遺言其子必求予銘予感公意乃以姪女孫許字公之子江公娶張性孝爲姑封嬖生女一嫁海寧陳慤繼趙生女一嫁青浦王肇嘉側室郭生子江三品蔭生葬于吳縣七子山清涼鳴背丁酉

兩淑人祔焉銘曰

鄧林蔽霄萬族穴巢有孤鳳皇翀飛哀號燎原一燧獸  
走鳥焦嗟鳳逝兮

帝命下招公今在天扶雲一笑噫我後死仰閭絕叫  
聖人旌直豈爲一人闡幽彰瘡忠正氣伸榮袞誅鉞惟  
皇福威垂蔭世世視此碣碑

鎮遠府分駐台拱同知李君墓誌銘

李君蓮亭余同年友也自戊辰通籍越十年出宰直隸  
臨城調棗強 大計卓異署涿州陞貴州平遠州署永  
城通判調威寧擢鎮遠府台拱同知致仕中間宦各一



方不相見者幾三十年乾隆丙午君來都執手道契闊  
今復十餘年而君逝矣君子爾庚將營葬不遠千里求  
誌于余余何辭君姓李諱應虞字咸五蓮亭其別號也  
其先由晉洪洞遷東平曾祖諱恕思祖諱銓父諱源皆  
不仕而有隱德祖父以君貴

誥贈奉直大夫妣皆贈宜人君生而岐嶷稍長落筆輒  
驚人幼失怙恃鮮兄弟家徒四壁立無擔石儲榮榮一  
身矢志勵學克承先業乾隆辛酉舉于鄉戊辰成進士  
及強仕慷慨任事凡利于民者得爲則爲之勢有所禁  
則力爭之方君之宰臨城棗強也勸農桑興蠶織獎士

子冒雨捕蝗祈神祛虎輒立應屢辦災賑焦心勞力俾  
實惠及民迄今兩邑士民猶嘖嘖稱頌不衰迨至黔省  
涖平遠屢審重案民以不寃署永城通判辦理積鉛數  
十年之沈滯一清調威寧委赴楚運踰六年事竣旋黔  
委署台拱同知旋補是任馴練屯軍武備不弛年六十  
九以病乞休君本學術爲吏治勤慎廉明數十年如一  
日不驚赫赫名與民休息性孝常以不逮事先人爲恨  
脩時祭必悲愴溢于顏面節省廉俸以濟桑梓感族甘  
澹泊不務修飾一如寒素風罷官清貧如初仍理故業  
教授生徒遇歉歲或不舉火而處之泰然孳孳以安貧

爲善訓其子孫真不愧儒吏也嘉慶元年丙辰與千叟  
宴 賜

御製詩壽杖如意金牌珍帛鄉黨榮之君生于康熙五  
十三年八月朔申時嘉慶四年六月二十四日卯時卒  
于龍山書院講舍年八十有六配傅氏贈宜人先君卒  
已葬子四爾庚監生爾斗廩生爾心爾翼俱業儒女一  
適庠生孟衍履孫男三長夢禾次夢泉次夢鯤孫女六  
以嘉慶四年十月八日未時合葬于東平城北輝山之  
新阡銘曰

英特篤生苦志學成移孝施政所莅有聲其生也壽其

歸也榮東原北郭鬱哉佳城勒銘珉石善蹟永貞

前博山縣知縣

詔起引 見武君墓誌銘

偃師虛谷武君旣卒之明年其孤穆淳走京師來謁曰  
先君從游筍河先生久及官博山也以所學見諸施行  
克廉以惠乃行懲番役事罷官民歌思之不忘

今上廉知其枉

特詔檄調來京而先期厭世命也公悉其本末旣詳乞  
銘之以彰不朽則死者誠不死也予不獲辭案狀君姓  
武氏名億字虛谷先世由懷慶軍籍遷偃師當 國初

時爲君之曾祖君祖朝龍考紹周雍正癸卯進士歷官  
至吏部郎中事蹟見筭河先兄所作神道碑兄弟六人  
君第五貌魁偉少喜讀書年十七喪父將冠母孟生母  
郭皆逝時伊洛溢屋圮架滂隰以居誦讀不輟斧朽木  
燎寒傷足血殷不顧年二十一縣試第一明年入學乾  
隆庚寅舉鄉試庚子會試中式 賜同進士出身以

知縣歸班用辛亥選山東博山縣季冬之官問土俗利  
病釐比邱尼勸節儉剏范泉書院進其秀者躬親講授  
以敦倫實學革煤炭供饋里馬草豆絕不以累民決辭  
無畱獄禱雨卽沛有干以賄金二千者曰汝不聞雷聲

乎某矢禱久矣輿情大洽乾隆壬子和伯相兼步軍統領風聞妄人言山東反賊王倫未定死密差番役四出蹤跡之于是副頭目杜成德曹君錫等從十一人橫行州縣入博山境信宿飲博手鐵尺指揮莫敢誰何君率役往悉取執之杜成德尤倔強出牌擲之堂隕目厲聲曰吾輩奉提督府牌緝要犯汝何官也不肯屈膝君立命役搥其脛伏地杖之曰牌役二名此外十一人爲誰且牌文明言所在報有司協緝汝來三日不吾謁何也吾通揭汝等騷擾狀矣于是咸叩頭求解去其事喧傳省中曰武博山鹵莽禍叵測且所緝何犯也將累及上

官時則委員絡繹于道有府佐劉大經者不悅君駕說于大府曰武令濫責無罪乃直書其事劾之伯相哂曰是暴吾差役之不謹而陰爲強項令地也封還其疏乃易以任性行杖空言奏上報罷其時闔縣民聞武君去官攜老弱入省幾千餘人乞畱我好官大府察其情悔之曰必還汝知縣姑散歸無譁乃挈君隨入

覲將

爲謀捐復策而伯相總吏部駁之其說遂寢謝曰君優于學且清貧爲授館于東昌啓文書院君雅不欲以己事累博山父老遂就聘其後館于亳州臨清魯山安陽鄧州無虛歲所至以小學經史古文倫品敎生徒曰安

往非吾學何必仕然知君者咸歎惜之嘉慶四年  
今天子親政和旣伏辜

詔各舉所知于是君之去官事聞

敕吏部原任山東博山縣知縣武億行文豫省巡撫咨  
部引見將革職原案查奏十一月二十九日

旨也而君先一月病終于里嗚呼天何旣白其令名而  
又奪之壽考耶豈陽德消長復之難而亨尤不易耶君  
勇于著錄有經讀考異義證金石跋詩文集百餘卷藏  
弄于家可爲不愧好古遺直者矣生于乾隆十年乙丑  
十一月二十二日卒于嘉慶四年己未十月二十九日



年五十有五配呂孺人男子三穆淳優貢生景淳後于叔父盛淳女子二孫一耒某年月日葬于某銘曰嗜古若渴氣食牛嫗民慈母愛不媮不畏強禦剛純鉤先追詔逝陽道州直幹屈鐵銘松楸

誥封中憲大夫鮑翁墓誌銘

侍御鮑君勳茂聞其父可園封翁有疾卽日請急歸中途聞赴痛艾莫解馳書告予乞銘曰得吾師銘或可稍追勳茂罪予憐其志不獲辭吾聞封翁治鹺維揚實總厥務而公私以辦寒士道其盛德不衰是必有大過人之才非可襲而取名實也同時程吏部振甲之考曰虛

谷翁光國總浙巖好行其德有令子與翁相堅齊名振甲與勳茂同歲甲辰

召試起家時人咸推美之顧孝子亟欲揚其親之善則舉天下之美皆歸焉而作銘辭者又稱善而過其實則兩無徵信反爲智者詬病盍約言之以求其信乎按行述封翁諱廷道後易志道字誠一號何園歛人自宋爲

莫樹鮑氏在明有顯官考諱立瑗

覃恩贈中憲大夫妣鄭贈恭人行一初家甚貧年二十游揚州佐吳太守尊德治巖以質直不欺稱侍母疾克孝友于弟啓運修祖祠輯宗譜置祀田助建紫陽書院

治歛之北河水射教子勳茂成名勳茂在官恂恂惟謹  
不驕不侈則封翁貽穀也配汪恭人側室許安人子四  
漱芳捐職員外郎勳茂

召試舉人內閣中書歷官掌山西道監察御史敬莊國  
子生候選司務書芸孫七崇城縣學生均貢生候選主  
事步墀咸培泰圻明墩明培生于乾隆八年三月十八  
日卒于嘉慶六年十月十三日年五十有九由道銜加  
頂帶一級以勳茂官

誥封中憲大夫掌山西道監察御史加三級以某年月  
日葬于某銘曰

以善發身人忘其貧以經易簾子穫以成名銘無溢文  
以昌其後昆

保靖縣知縣曹君墓誌銘

先妣徐太夫人有從父妹適曹生子庫大使召南天津  
學生景紱爲予姨表弟以書來曰先考妣葬有日矣請  
爲銘不獲辭案狀曹氏由會稽遷順天通州入籍大興  
諱焜公仕至河南遂平縣知縣生子雲昇字履平年十  
五入府學貧不能娶贅于天津徐氏逾年請于夫曰姑  
老矣居通州誰爲侍養府君曰吾豈忍一日忘母耶今  
寄食外家可若何孺人曰我質簪珥業鉞耒以養君勿

憂乃迎養于津乾隆丁巳府君成進士歸班選湖南安化縣御兄弟爭產之金而判令合食民感化俗以不佻充乾隆丁卯鄉試同考官取士羅君典爲名解元調保靖治苗有敘脩魁星閣苗始發科乙亥五月卒于官孺人率幼孤涉洞庭下荆襄崎嶇返里教子而名立子四衛安驥隆皆國學生召南乾隆甲午科舉人揀發山西借補藩庫大使景綬府學生孫九曾孫四府君生于康熙壬午年正月十九日卒于乾隆乙亥年五月十五日年五十有四孺人生于康熙辛卯年十月十五日卒于乾隆乙巳年四月六日年七十有五嘉慶七年壬戌合

葬天津城西大稍直口銘曰

從母之夫保靖令賢孺人晝荻厥子仔局城西直口鬱  
哉新阡庶幾孝友後熾而緜以光爾先

工部侍郎蔣公墓誌銘

工部侍郎霽園蔣公卒于官大宗伯紀公旣爲狀矣其  
子太僕卿予蒲將奉柩歸睢州與湯夫人合葬于城東  
新阡而請予爲銘予實悲四十年老友之喪而與太僕  
談性命之學有淡契何得辭案狀公姓蔣氏諱曰綸字  
金門霽園其號也先世由新建遷睢州至公高祖諱奇  
猷順治己丑會試副榜舉鄉飲大賓輸穀賑饑祀鄉賢

會祖諱文臣祖諱禧運父諱辰祥乾隆壬戌科進士改庶吉士三代皆贈如公官庶常公不壽公早孤太夫人撫之有成弱冠入州學累試冠軍食餼歲歉鬻鄉人女侍太夫人旣而歸之不取其直鄉人稱其厚德丙子舉於鄉庚辰成進士爲予同考所薦士改庶吉士公方少年穎秀偕謁予師金宗伯海住先生顧大理息存先生兩師與庶常公爲壬戌同年喜予得人辛巳授職編修充國史館纂修總裁劉文正賞其修書盡心不詭隨丙戌保送御史戊子補山西道監察御史巡視西城發猾吏利誘某婦案繩以法奏請每科會試取錄內閣中

書又奏督撫不得指名揀發人員皆得

旨允行晉戶科給事中轉禮科掌印給事中辛卯充順  
天鄉試同考官壬辰充會試同考官丙申丁母憂己亥  
服闋補工科給事中轉兵科掌印庚子擢順天府府丞  
提督學政與金臺書院諸生講貫成就多士丁未晉光  
祿寺卿游太常大理寺卿嘉慶己未陞左副都御史奉  
命視學山左未幾陞禮部右侍郎轉工部左侍郎辛酉  
充會試總裁壬戌調右侍郎管理錢法堂事務時嗣君  
擢官回卿父子同列真盛事也太僕君獲異傳參同悟  
真之學實有所得公亦心知其意曰吾老矣不能學也



不失吾眞可矣嘉慶八年春感微疾數日端坐而逝時  
二月廿九日也距生于雍正己酉年某月日年七十有  
五配湯夫人文正公元孫女少勤苦孝于姑勤儉持家  
先公八年卒子三子蒲乾隆辛丑進士由庶吉士改主  
事洊至太僕寺卿次子藩蔭生廣西北流縣知縣次子  
藻孫三恩銘恩鏞恩鐘女四孫女三以某年月日合葬  
銘曰

翹翹嘉植先我枯厥子拱璧翁莫扶睢州貽壺儷孔都  
庇爾松根荅於菟

光祿寺卿范君墓誌銘

范君叔度卒之明年其孤準將奉其柩歸葬于江寧之  
祖墓而請爲銘案范氏由吳而婺而嚴明初始居金陵  
八世至君考諱文聯游京師配陳生子三長鐸次鐘  
君其季也出後世父諱文忠君貴本生及所後考妣皆  
誥贈如君官君名鏊字叔度號攝生先是有上虞張秀  
才光嶽好奇喜相士先兄冠山託之相攸張君一日來  
告予兄弟曰我於市衢中見一童子其秀逼眉宇容訪  
之遂謁君伯兄於舍曰君弟偉器然須我授之書乃辭  
所館而就館於范甫閏月曰我非能久居於此將薦之  
於朱竹君太史而爲媒于其兄冠山遂力爲蹇脩焉于

是締姻于家兄之長女而讀書於我家既入籍大興爲諸生乾隆戊子科舉順天鄉試己丑取中正榜授內閣中書直軍機處庚子成進士改庶吉士辛丑散館改刑部貴州司主事陞湖廣司員外郎陝西司郎中總辦秋審京察一等以陞銜畱任丁未臺灣林爽文作亂隨福將軍出征是時彰化鳳山諸羅告急君從渡海遂擒林爽文莊大田凡獲俘囚將軍屬君訊之多所全活以軍功

賜戴花翎己酉擢陝西道監察御史庚戌正月以監放賞賚外藩散班早効降主事奏畱刑部游陞浙江司郎

中丁未庚戌癸丑乙卯四充會試同考官王子典湖北鄉試甲寅典四川鄉試乙卯督學湖南嘉慶四年陞鴻臚寺少卿旋擢通政使司副使辛酉分查北路水災陞光祿寺卿監盧溝橋賑務

上方嚮用君乃未竟其施以勤賑染時疫遂卒可惜也君晚年慕道爲善孜孜不倦友愛于厥兄念其老病對予言及輒涕泗不自止可爲天性醇摯者矣君生于乾隆癸亥七月十四日卒于嘉慶壬戌四月二十八日年六十娶朱氏贈封中憲大夫

日講起居注官翰林

院侍講學士 文淵閣直閣事先伯兄諱堂公長女子

二長準附監生兩淮鹽運使司廣盈庫大使候選知府  
次潤監生候選鹽課大使女五長適太常寺典簿劉圭  
次適甲寅科舉人內閣中書王鼎文三適己未科進士  
庶吉士刑部主事曹汝淵四適子孫舉人涂五適監生  
吳華基孫四承詒順天府學附生承祖承壽皆準出承  
典潤出孫女三某年月日葬于某銘曰  
籥雲騰上中達推爲善日益志勿墮反藏于南魂九閻  
炯炯者性何去來

前陝西漢興道陳君墓誌銘

嘉慶九年前陝西漢興道陳君旣葬其子預請于予曰

先人有遺命毋刻詩文集毋從世俗刊布行狀預出先生門先生文字信今傳後無讓于古人竊體先人遺意不欲以一生文行附世俗虛誕之文設當代有韓蘇其人振筆而傳之亦先人之靈所重望也謹書行狀之藏於家者幸先生據之以傳我先人以償不孝等之願敢請案狀君諱庭學字景魚晚歲自號蓮東逸叟世居吳江有陳孝子君之二世祖也君少時已以文雄著籍京師受知于金檜門錢東麓竇東臬諸先輩乾隆三十年乙酉以拔貢生中式順天鄉試明年丙戌成進士己丑補殿試授刑部主事分湖廣司行走充提牢補山東

司充辛卯科雲南鄉試副考官旋擢江西司員外郎俸  
滿徵取繇缺知府復擢奉天司郎中乙未選授山西潞  
安府知府戊戌署蒲州府事是年擢甘肅驛傳道署按  
察使事庚子調陝西漢興道辛丑以甘肅災賑案株連  
奪職謫伊犁君居官務持大體不趨權勢在刑曹日爲  
劉文正公所器重及外任府道所至以振興文教培養  
人材爲先務顧性豪邁坦直率下不尙苛察卒以是爲  
屬吏所累罹于謫戍未竟其用惜哉君旣至戍所益肆  
力于詩古文詞時繼母金太恭人在堂陟屺之感與望  
闕之忱時時形於著述原本忠孝讀者悲之居伊犁十

四年始派糧餉處行走繼奏管惠寧城倉務

恩復主事銜歲乙卯

賜環歸京師時君二子預雲

皆先後成進士官于

朝不以事畜事累君君日以訓

課生徒口授指畫爲樂尤工制舉文所教士多高捷交  
請以所著付梓人君夷然不應也計自爲諸生數歷中  
外經患難得歸歸而享家人之樂數十年中手未嘗離  
卷帙絕不以門第高甲仕宦得失爲榮辱惟涵蘊於詩  
書淡故胥次寬然險夷一致將易簣猶與子弟輩剖晰  
國策疑義明練如平時嗚呼可謂好學矣生于乾隆四  
年正月二十三日卒于嘉慶八年三月十六日春秋六



十有五始祖諱徵曾祖諱聖典祖諱應鳳父諱文瑞始  
由吳江遷宛平以君貴贈如例子預庚戌進士四川永  
寧道以軍功

賞戴花翎雲癸丑一甲二名進士以編修改吏部主事  
陞員外郎配秦氏封恭人先君卒與君合葬宛平小井  
新阡銘曰

龍沙浩渺兮公溢歸華表亭亭兮鶴遠飛幽寢安兮文  
光世起福繩繩兮庇孫子

孫母許太恭人墓誌銘

吾聞之吳庶子肅曰常州孫太母許太恭人奇女子也

少從父宦于粵西贅孫封翁枝生二年生子孝勳夫卒  
恭人年二十三父無子欲以外孫爲子而奪恭人志恭  
人以死辭曰女生死孫氏矣有後當祀許如孫父知不  
可奪乃己己而父卒于義寧官所恭人扶父與夫之柩  
挈孤崎嶇歸于常葬舅姑及父母如禮手鍼黹課孤孝  
勳讀書舉順天鄉試抱孫星衍授之書星衍能文乾隆  
丁未一甲第二人及第咸謂太恭人苦節之報孝勳初  
爲句容縣儒學教諭乾隆二十四年請旌于朝  
敕封太孺人比選爲山西河曲縣知縣星衍由編修改  
官刑部游歷郎中出爲山東分巡兗沂曹濟道署山東

按察使再官山東督糧道皆迎養于署

誥封太恭人太恭人九十有八矣神明矍鑠不衰豈非  
奇女子不愧文介公之家風者哉初星衍有族妹家貧  
將爲貴人選星衍不可以爲己妹而相攸得肅肅貧士  
也星衍才之委禽焉人以爲疑已而肅入翰林乃傳爲  
嘉話星衍與肅皆珪所取士也故知其家事最詳嘉慶  
十年六月太恭人邁疾不旬服藥十九日酉時終于  
德州糧道署時子及三孫星衍星衡星衢皆侍側太恭  
人生于康熙四十七年戊寅正月七日酉時星衍以其  
父孝勳狀來請銘于珪珪不得辭銘曰

毗陵之陽陽羨陰三江合流湛且淡篤生奇女丁婦王  
文介磊舉家風森百齡節孝天可謚有孫三象魁枕參  
大書不朽嵌石金

何母申太夫人墓誌銘

乾隆庚子冬珪將之閩學使任舟過清江浦有河庫道  
何公裕城謁於舟次是爲恭惠公之子善人也甲辰珪  
扈從

南巡

召試江浙諸獻賦士閱卷于浙得士四人其一何金公  
之子也乙巳何公以陝西巡撫入  觀晤于邸呼金

出謁朗朗玉樹喜善人有後矣庚戌公卒于皖撫珪代之送公喪于江口比年金由中書遷侍讀直軍機京察外用以母老辭詢知賢母申太夫人就養于次子河南糧道任嘉慶甲子冬金聞赴星馳之豫明年以狀來請銘珪不獲辭夫人申氏山西陽曲人廣西按察使諱夢璽之次女繼室於何隨侍恭惠公于官所邁姑湯夫人之喪歸于浙聞恭惠公之赴助夫喪葬盡哀禮恭惠公雖貴而好施宗族貧交待其舉火者夥督撫官署如禪林也夫人孝于翁姑相夫子體考意雖歷官數省孜孜好善不倦故何氏世稱長厚篤於孝友膏粱而不忘

疏素其家教習與性成所謂積善之家必有餘慶天道  
信然也夫人有子五人鐘廣東潮州府黃岡同知進室  
楊宜人生其次銑河南糧鹽道夫人生次錡同知楊宜  
人生次鉞同知先卒其季金夫人生女三孫九潤湘浩  
治沅潢沛澧瀛曾孫二棻杞夫人生于雍正八年庚戌  
十一月五日申時卒于嘉慶甲子十一月八日子時享  
年七十有五

誥封一品夫人某年月日葬于某銘曰

浙浙台流中江南晉陽所出東盍簪恭惠家世燈一龕  
令妻壽母孝婦兼宰官說法如瞿曇我銘窆石無妄談

誥封朝議大夫史乙山墓誌銘

乾隆歲丁酉先兄竹君設教于家史君鴻義因其族姪  
今廉使積容來謁請業於先兄時聞史君好善爲戶部  
銀庫吏有聲先兄辭曰予及門士多矣無爲吏者史君  
曰鴻義已辭吏願讀書可乎先兄乃進之予益聞史君  
賢見善必爲凡史姓之鰥寡孤獨及過時未嫁娶未葬  
者皆待以生以殯以婚不下數十人矣予謂兄曰兄門  
無所不誘然而篤行說救人急乏如史君者可謂利仁  
勇于義第一也已而歲己亥史君與男錫經同舉于鄉  
予在三衢舟次見順天題名錄叫然曰天道其如券平

史善人中矣及甲辰君次子積英成進士庚戌予主會  
試君長子積中出身官戶部游陞郎中甲寅少子積誠  
積賢同舉于鄉君之力善愈不懈晚而好道予乃歎曰  
天之報善不已先之以福復將進于慧吾于史君益信  
嘉慶壬戌君以疾卒越三年乙丑積中以狀求予銘案  
狀史氏本出朱越王浩之後由四明遷會稽十四傳至  
君考容正贈如孫積中官贈公兄弟四人遷京師娶金  
生子二長鴻義字乙山號炯齊卽君也次純義君娶于  
俞戊寅君年二十矣入籍宛平府試童子第一未院試  
而遭父喪乃改業爲吏者十九年家稍充孜孜力善復



精理舊業四十一舉于鄉又教其子及于昆弟族姓之  
子遂父子聯掇科第史氏之出身冠魁廷試鄉會榜者  
磊落相望君歸浙掃墓由會稽而至四明脩廢舉墜合  
祀遠祖像于家史氏之在京者皆與祭每歲三其他賑  
貧收賂之舉無不與中間一至積英官舍于沅陵適丁  
苗變登陴誓其眾曰吾知縣父也寇至當死守毋怖眾  
志乃定其勇于義也如是珪間與君會恂恂退抑執年  
家子禮甚恭不知其仁且勇者善之篤也雖家業中落  
不悔惜乎未竟其志以底于成也君生于乾隆己未十  
月十三日辰時卒于嘉慶壬戌二月二十三日卯時年

六十有四

誥封朝議大夫戶部廣東司員外郎加二級配兪恭人  
能助夫爲善友于娣姑凡食口百人各如其意體恤之  
無不周卒于嘉慶癸亥十月二十三日年六十有七某  
年月日合葬于某銘曰

嗜善飢渴聞必臻篤近及遠周于親報福如響子誥誥  
去何歸乎仙所賓配德克淑善者嬪世濟厥美榮

綽綸大書特書鏡貞珉

太子太傅東閣大學士軍機大臣 予告在家

食俸 特贈太子太師諡文端王公墓誌銘

韓城王相國受

兩朝恩遇嘉慶七年年七十有八矣以老疾屢陳告休  
上鑒其誠

俞所請明年公歸

上存問不絕甲子冬公年八秩先期

上命陝西巡撫方公維甸齎捧

御製詩額珍服就

賜其家公拜受驚寵諷日啓行及臘抵京謁謝

命肩輿入朝扶杖

召見

賜以詩乙丑正月七日面對敷陳無隱翌日之夕珪  
就食于公寓十日以考終聞

上驚悼加贈太子太師賚白金二千兩治喪諡文端嗚  
呼公可謂忠清上達矣其孤塋時塋時奉柩歸塋時以  
狀請珪爲文表其墓珪不得辭案狀公諱杰字偉人號  
惺園晚號葆淳王氏先自洪洞遷韓城五傳至光祿公  
石門主簿諱廷詔娶吳夫人生子三公其季也四歲隨  
考至浙八歲能書大字十八入學從武功孫酉峯游聞  
關閩之學癸酉拔貢引

見以教職用丁父憂尹文端公總制兩江聘入幕司書

記文端內

召薦之蘇撫桂林陳文恭公聞性命躬

行之說益自信己卯中副榜庚辰舉於鄉辛巳成進士  
殿試

高宗純皇帝擢第一人見諸詩受知之始也壬午充湖  
南鄉試副考官甲申督學福建丁亥授侍讀戊子晉左  
庶子十月擢侍講學士己丑遷少詹事充武會試主考  
官辛卯充 日講官直 南書房晉內閣學士典江

西鄉試督學浙江甲午署工部右侍郎授刑部右侍郎  
乙未充會試副考官丙申再視浙學丁酉署禮部侍郎  
轉吏部右侍郎充四庫三通 國史諸館副總裁戊戌

充會試副考官己亥轉左侍郎典浙江鄉試充 武英  
殿總裁庚子三視浙學壬寅授左都御史癸卯丁母憂  
甲辰卽家擢兵部尙書趨赴 行在謝

恩

高宗曰汝來甚好君臣之情當如是然汝儒者朕不欲  
奪汝情歸終制可也公感泣時珪扈

駕相遇于行帳歎曰

上待公不薄哉乙巳服闋充 經筵講官丙午

賜紫禁城騎馬是夏充 尙書房總師傅冬直軍機處  
丁未拜東閣大學士總理禮部充會試正考官

賜花園住房各一所戊申臺灣平圖形紫光閣己酉充  
會試正考官平廓爾喀再圖形閣中冬罷 尙書房行  
走庚戌充會試正考官加太子太保辛亥仍直 尙書  
房甲寅冬

賜聯額如意珊瑚珠冠服爲之壽丙辰以足疾辭退兩  
書房軍機禮部事戊午仍直軍機己未

高宗升遐

上親政命總理喪儀充

實錄館正總裁以腹疾請休奉

旨慰留

命扶杖入朝辛酉充順天鄉試正考官壬戌再以疾固

辭

予告在家食俸加太子太傅癸亥回籍 賜

御杖人藁

御製詩寵其行歸里後奏摺

批答如家人禮明年公與程夫人齊眉開秩謝

恩赴 闕兩旬而薨于邸公生於雍正三年乙巳十月  
二十七日寅時終於嘉慶十年乙丑正月十日子時壽  
八十有一其少壯備嘗辛苦三十七成名游歷魁台四  
十年受



兩朝知遇始終無間持文柄者十二次人不敢干以私  
在軍機相位和而不同耿直清介正色直言可謂有守  
矣珪於公忝先進而公游九列珪稍迴翔故往來蹤跡  
頗疎男錫經再喪偶未斂曹慕堂宗丞適爲公女相攸  
某氏公不欲曹曰有一人遲則將爲他姓得耳公問爲  
誰曹曰朱石君之子弦斷矣公曰石君前輩我重其人  
必有後君其爲我謀之曹來弔曰有一言郎君必將續  
娶作伐者待我可乎予怪之已而予妻弟陳奉璽至其  
言與曹同予益詫問乃知出韓城意予曰姑待期年後  
予言可也予感公之相知明年問名焉嗚呼公以素心

相質重以昏姻真直諒友也嘗以爲學品似王魯齋甲第同康對山著錄若干藏于家側室姚黃子四堞時主事銜堞時監生先公卒堞時廕生兵部武選司員外郎堞時廩生孫九駒駒隲驢篤駉騫駉十一月十一日卜葬于縣北原高沙岸新阡銘曰

龍門之陽黃河之西實生偉人魁枕參觜金華文憲武功對山品第兼之三達孰班蹇蹇色言介介進退不磷不緇寡尤寡悔

兩朝知遇八秩去來篤實光輝生榮死哀夏陽北京豔碑屹屹何以表之

如綸如綽

經筵講官 太子少保協辦大學士禮部尚書管國子

監事諡文達紀公墓誌銘

嘉慶乙丑二月協揆獻縣紀公薨於位其冬公子汝傳  
孫樹馨以狀略來請銘珪隤然老矣同年同官失我老  
友吾何以表公哉顧諠無可辭案狀公紀姓諱昀字曉  
嵐一字春帆晚號石雲行四世爲河間著姓祖考諱天  
申行德于鄉里歲饑出粟數千石活人無算考姚安太  
守諱容舒嘗督責公曰汝何知吾父罄家資輸粟活一  
方故食報于汝汝以爲能文名解元耶先是郡爲九河

入海故道天雨則汪洋成巨浸水中夜夜有光怪公王  
父夢見光入樓中已而公生光遂隱人以爲公實此靈  
物化身也少而奇穎目數行下夜則暗室閃閃有光照  
見一切物了然可辨比知識漸開光亦斂矣故公自慧  
言之不諱應學使試輒冠軍年二十四乾隆丁卯科遂  
發解初闈中擬珪首卷得公卷同書經二場表儷語冠  
場乃定公第一珪第六主試阿文勤公劉文正公榜發  
皆以得人賀二公復

命遂以兩人姓名

上聞故公與珪皆早受

特達之知所由來也明年珪捷而公遲至甲戌乃與先  
兄竹君同榜 廷試二甲第二人

賜進士出身改庶吉士丁丑散館一等授編修旋辦院  
事己卯充山西鄉試正考官庚辰充會試同考官辛巳  
京察一等以道府記名壬午充順天鄉試同考官

命視學福建癸未陞侍讀明年丁父憂服闋補侍讀充  
日講起居注官晉左庶子戊子授貴州都勻知府旋以  
四品畱任擢侍讀學士緣事坐謫發烏魯木齊效力時  
遣戍單丁五年積至六千人爲都統具奏稟得

旨咸釋爲民辛卯

召還授編修三十八年擢侍讀時開四庫全書館

命爲總纂官搜羅逸書與內廷翰林一體宴賚同事

者陸君錫熊提調則陸君費澤而公實總其成丙申擢

侍讀學士充文淵閣直閣事日講起居注官丁

酉京察一等己亥擢詹事旋晉內閣學士總理中書

科壬寅授兵部右侍郎仍兼直閣事改任不開缺異數

也公館書局筆削考核一手刪定爲全書總目褒然巨

觀弄之七閣眞本朝大手筆也癸卯轉左侍郎甲

辰充會試副考官知武會試貢舉乙巳晉左都御史丙

午轉禮部尙書充經筵講官丁未管鴻臚寺印鑰

戊申

賜紫禁城騎馬充武會試正考官後爲總憲者五大宗伯者三王子以畿輔水災 奏請截畱官糧萬石設十廠賑飢得

旨六月開廠後增五廠自季夏至明年四月全活無算嘉慶元年丙辰充會試正考官授兵部尙書己未充武會試正考官癸亥六月以八旬開秩

上遣官賚多珍教習壬戌科庶吉士奏婦女猝遭強暴捆縛受污不屈見戕者例無旌表臣謂此其志捍刃捐生與抗節被殺者無異如忠臣烈士誓不從賊而紮縛

把持雖使跪拜可謂之屈邾賊延哉請

敕交大學士九卿科道公議與未被污者略示區別量  
予旌表經大學士保寧等議奏如兇手在兩人以上顯  
係孱弱難支與強姦被殺者一體予旌飭交各督撫勘  
明情形請

旨定奪報可乙丑正月奉

旨調禮部尙書協辦大學士加太子少保管國子監事  
初珪與公同舉于鄉先後同官翰林公之典聞學也珪  
先爲福建糧道兼攝福州府爲公府試及遷閩臬明冬  
與公同丁外艱辛卯珪任晉藩公環 召過晉署宿



留數日及官京師先後衡文公有文人相矜意與珪不  
可相下及辛酉珪病臥牀公來視疾見予所爲文歎服  
以爲向不知公昫過矣比甲子忽語珪曰昫自辛酉十  
月三日夢中覩公覺而驚悟此後心悅誠服雖燕居他  
處不可道公一不字矣予大竒曰何訂疑而後然耶其  
後往來日親公之協揆珪所遺缺也二十六日同拜

恩命二月四日連騎入內閣同上翰林院中堂任十日  
而公病十三日昫予過門視疾見公于牀執手曰昫無  
他病苦痰涌耳明日酉刻公薨協揆纔十八日耳十五

日早遺摺

聞奉

旨紀昀學問淹通辦理四庫全書始終其事十有餘年甚爲出力由翰林游歷正卿服官五十餘載本年正月甫經擢襄綸閣晉錫宮銜遽聞溘逝深爲軫惜加恩賞陀羅經被派散秩大臣德通帶同侍衛十員前往賜奠竝賞庫銀五百兩經理喪事任內處分悉予開復應得卹典查例具奏

賜祭葬

予諡文達公生于雍正甲辰六月十五日午時終于嘉慶乙丑二月十四日酉時壽八十有二配馬氏封一品夫人子四某某某孫十一曾孫一某年月日葬于某

銘曰

九河之尾馮夷宮或噓金關珠光熊緋衣遊戲波濤東  
紀氏陰德英產鍾蔚爲文伯氣吐虹與我訂交金蘭同  
五十九年寅協衷離合疏數惟化工表公之石磨桓豐  
日講起居注官 文淵閣校理教習庶吉士詹事府左  
春坊左庶子加二級汪君墓誌銘

汪君靜厓旣葬之明年其子彥博彥國求補銘予與君  
尊甫少司空爲戊辰同年知君淡不得辭君姓汪諱學  
金字敬箴號杏江晚號靜厓太倉州人高祖諱壽堯曾  
祖諱溥以淳德稱於鄉詳州乘祖諱之恆俱贈工部侍

郎父諱廷璵乾隆十三年一甲三名進士由編修歷工部左侍郎祀鄉賢前母凌母王並封一品夫人君將誕王夫人夢一老僧作頂禮狀三歲戲畫地作八卦上海曹劍亭見而奇之以從弟菽圃女訂婚焉八歲能詩十二隨司空之闕學政署予方觀察閩見君藝曰此子筆有仙才司空命君師事予十八入學二十三中順天庚寅鄉試二十七官內閣中書二十九協辦侍讀三十四捷禮闈殿試一甲三名進士與司空接武司空無疾沒於京邸君奉喪回里卜葬以凌太夫人耐復爲大父贈公改築新阡服闋起辦翰林院事恭遇

國慶以其官馳贈仲父廷璠叔母滕丙午考差

特命 皇子總閱君卷首拔後己未歲

上謂大臣曰是能詩者蓋

今上於潛邸時特邀

睿鑒焉秋充江西主考官丁未散館一等二名 京察

一等記名以道府用掌院奏畱加一級仍辦院事己酉

教習庶吉士充 武英殿方略館總辦夏五月太夫人

疾終京邸扶櫬歸耐葬司空公塋君子孝養喪葬之事

無不竭情盡慎而精力漸憊乃有脫屣塵俗意庚戌春

里中有開濬七浦之役七浦爲州水利門戶潮汐挾沙

積久涸如平陸州人上諸大吏作書敦請君念桑梓誼  
不得已應之畫陟鳩工晝夜督視百年久廢之工百日  
竣事服闋再入都尋引疾旋里以田宅析授彥博彥國  
誠之曰母虛取失先人之寬厚毋奢用改先人之清白  
以供祠墓以周窮急可也甲寅春謁予于皖江撫署昕  
夕侍談巾月歸予曰何所聞而來何所見而去耶曰所  
見大進一談一笑無非天理是秋歲偏禳白之州守于  
君鰲圖倡設粥廠於海寧寺輸銀米三千餘紳士襍被  
寺中籌畫核實全活者萬計於家塾設規立課示以程  
式作九容正心箴揭之座隅建育嬰堂更邑之舊竝爲

條件命彥國偕同志經理君析產後所有膳資半爲利濟功德如恤發義園惜字放生夏施茶藥冬施棉米等事孳孳不倦曰吾年已半百享受無幾盡此長物藉結善緣丁巳八月重來皖江沿途避人若浼予戲曰君大似陳仲子蓋其廉介如此己未五月

召修

純廟實錄君不敢以衰疾籲陳卽假裝就道抵都甫二月擢右中允署 日講官教習庶吉士恭遇

覃恩以其官馳贈季父廷瑚叔母余陞侍講庚申春轉侍讀充 文淵閣校理補 日講起居注官

召對乾清宮

天語連稱好學問者再

垂詢司空侍

講席時事六月陞右庶子旋轉左復蒙

召對

上問汝何不考差對以臣有頭暈疾未能楷書又

諭汝子已放考官汝何瘦耶卽歷陳病由感激欲涕辛酉春有應陞祭酒缺君亟請假歸予爲之太息曰不愧吾門矣遂以曾孫甘林與彥博之女訂婚問名之日君卽飄然出都自是栖心簡寂以詩酒寓情癸亥以

實錄館議敘在籍加一級春同里紳士呈請司空公祀



鄉賢報可里鄙榮之秋長孫元爵入領君曰門庭可謂  
盛矣吾事已畢桑榆光景不戀時也冬至患脾泄甲子  
二月廿八日午時卒君秉性高明持節廉介儒修禪悅  
兩相融浹所造漸臻深粹著作華瞻雅正敷揚典誥陶  
寫性靈臺閣山林兼擅其美所著有井福堂文彙凡應  
制進 奏之作及闡論經史序記事物者其十卷靜厓  
詩初彙十二卷後彙十二卷續彙六卷館閣詩賦六卷  
輯稗史詩派二十八卷皆已刊行其才不甚恢廓蓋名  
家流也生于乾隆十三年九月二日寅時年五十有七  
以嘉慶十年九月廿七日祔葬於司空公之墓昭穴在

州境二十四都五骨昆字玕琅玕九曲鎮配曹封恭人  
晚而同脩淨業子彥博乾隆甲辰

召試舉人丁未進士歷編修刑部廣東司員外郎彥國  
候補五城兵馬司指揮女一適候補理問陸受秩孫元  
晉州庠生娶劉侍郎鳳誥女元翼元福元仁俱幼孫女  
五長許字陳秀來次許字王元鑒次許字陸長庚次許  
字朱甘林次幼銘曰

生而穎奇晚而孜孜行善若渴不顧傾疑君歸何所神  
化莫窺霞光萬道魂氣所之洞真邈矣并福在茲

元配陳夫人墓誌銘

夫人姓陳諱穎宛平人考諱邦勳雍正己酉舉人官至  
思南府知府妣茅恭人夫人年十八歸予逮事舅稱其  
賢侍庶祖姑李太淑人甚謹視庶姑謝有禮宐於家人  
從予自翰林歷官閩楚晉反於京師二十七年無違德  
生子二錫經府學生娶徐氏錫緯娶張氏女一適通州  
學生馮秉驄撫姪女一許嫁通州學生劉筠三遇

覃恩

敕封安人

誥封恭人晉封夫人皆賜贈先世乾隆四十年乙未八  
月十日疾卒於內寢生於雍正十年壬子五月二日年

四十有四長婦徐錢塘人考諱景熹乾隆己未進士官  
至福建鹽法道妣張恭人婦年十八歸錫經甚嫻端侍  
姑疾亦病姑歿後四旬九月二十一日卒生於乾隆十  
八年癸酉正月七日年二十有三明年丙申三月六日  
丁丑葬夫人於金霞山之麓呂邨東負庚面甲兼酉卯  
婦徐迤右數武銘曰

先予歸安於斯從者婦骨肉宜

知足齋文集卷第五